

Regional News Unit AIR Aizawl
Monday, December 30, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Ministry of Home Affairs (MHA) chuan Mizorama Myanmar raltlan awmte biometric data laksak tura sorkar a rawn hriattir chu tun thla thleng pawhsei a ni chungin hriattirna a rawn pe leh rih lo.
- Lunglei khawpui bul Hrangchalkawnah nimin khan truck a petrol phurh, plastic bura dah a kang a, mi 2 hliamin truck hi a kang chhe hneh hle.
- Prime Minister Narendra Modi an Dan chu India hnam kaihruaitu bul ber anih thu a sawi.

<><><>

BIOMETRIC ENROLLMENT

Ministry of Home Affairs (MHA) chuan Mizorama Myanmar raltlan awmte biometric data laksak tura sorkar a rawn hriattir chu tun thla thleng pawhsei a ni chungin pawhsei belh a ni rih lo.

Sorkar hmasa MNF sorkar lai khan MHA hian Mizorama Myanmar raltlan awmte an mit naute thla la a, an kutze thla la vek turin Mizoram sorkar a rawn nawr a. Sorkar khan inthlan a hnaih tawh chhuanlamin tih rih loh turin council of ministers thukhawmin thutlukna an siam a. Assembly leh Lok Sabha inthlanpui a zawh hnu-ah pawh biometric data lakkhawm hun hi kumin December thla thleng hian MHA chuan a pawtsei ta a. Tunah hian December thla chu tawp titih tawh mah se thu leh hla thar engmah an la rawn neih leh lo niin home department hotute chuan an sawi. Home department hotute'n an sawi dan chuan MHA-in biometric enrollment tihna tura form an rawn siam hi a dik lova, ramdangmi India ram atanga thawnkir (deport) turte chhinchhiahna form an rawn thawn a, hei hi a hman theih loh avangin siamtha tura tih an ni a. An rawn thawn nawn leh pawh hetiang tho hi a nih avangin siamtha leh tura hriattirna an thawn thla leh a, an la rawn chhan leh rih loh avangin an ngawi tlang ta rih a ni. Kumin kum bul lam khan Union Home Minister Amit Shah chuan Chief Minister Pu Lalduhoma hnenah Myanmar rama muanna tluantling a awm hma chuan raltlante hi hawtir an nih loh tur thu a lo sawi tawh a. Tun hnai khan Myanmar leh Bangladesh raltlante leh Manipur atanga rawn tlanhchiate tan buhfai metric tonne 1,379 chuang, cheng vaibelchhe 5 man a thlawna sem tur a rawn pe a, sem mek zel a ni. Disaster Management & Rehabilitation department chhinchhiah dan hnahnung berah (December ni 18) Mizorama Myanmar raltlan awmzat hi a tlem ve hret hret chungin mi 32,794 an la awm mek a. Kum hmasa lamah khan an mimal chanchin (biographic data) lak vek an ni tawh a, chubakah identity card pawh pek deuh vek an ni tawh.

Raltlan 32,794 zinga 10,002 hi mipa an ni a, 10,340 hi hmeichhia niin 12,452 hi naupang an ni. An zinga 16,892 te hi district 7 a relief camp 127-ah an awm a mi 15,902 te erawh chu relief camp pawnah an awm thung a ni.

<><><>

GOVERNOR

Larsap kal chhuak tur Dr Hari Babu Kambhampati chu vawiin hian Raj Bhavan Durbar hall-ah thlah a ni dawn.

Raj Bhavan atanga thu dawn danin larsap kal chhuak tur hi vawiin chawhnu dar 3 hian Durbar hall-ah Raj Bhavan a thawk official-te'n an thlah ang a. Sorkarin a thlahna hun erawh chu Aizawl a chhuahsan ni, kum thar January ni 2 khian buatsaih a ni ang a. January ni 3 khian Odhisa khawpui Bhubaneswar Raj Bhavan-ah thutiamtir a he state larsap ni tura lakluh tura ruahman a ni. Mizoram larsap thar tura ruat General Vijay Kumar Singh lo chhoh hun tur leh thutiam a rawn lak hun tur hi a la chiang lova. Vawiin lamah chuan a chian theih tawh beisei a ni a. Vawiin hian Chief Secretary Pu Khilli Ram Meena hovin official pawimawhte'n larsap kalchhuak tur official-a thlah dan tur leh a thar thutiamtira lakluh dan tur hi an sawiho dawn ni a thudawn a ni.

Puan tawh thin angin Odhisa larsap Raghubar Das banna President Droupadi Murmu-i'n a pawm tak avangin Thawhlehi kal ta tlai lamah khan state thenkhat a larsapte awmna siksawi a ni a. Mizoram larsap thar atana ruat General Vijay Kumar Singh hi India ram sipai lal ber (Chief of Army Staff) 24-na a ni a, Indian Army atanga a chawlh hnuah Politics-ah a lut a, kum 2014 leh 2019 Lok Sabha Inthlanpuiahte khan BJP ticket-a dingin Ghaziabad, Uttar Pradesh atanga thlan tlin a ni a. Prime Minister Pu Narendra Modi kaihhruai term khatnaah khan Minister of State for External Affairs, Minister of State (Independent Charge) for DoNER leh Minister of State for Statistics and Programme Implementation-te a chelh a. A term hnihnaah khan Minister of State for Road Transport and Highways leh Civil Aviation-te a lo chelh tawh bawk.

<><><>

LUNGLEI AQI

Lungleia Mizoram Pollution Control Board air quality Monitoring station data atanga a lan danin Lunglei boruak a la tha thawkhat.

Lunglei boruak hi a thianghlim zawng tehna-ah ram pum huap dinhmun 60 micrograms per cubic meter hnuaiyah a la awm. Kum thum kalta data atanga a lan danin Lunglei Air quality hi a la pangngai viau a, a san lai berin kumin February thlaah 38 micrograms per cubic meter a ni a. Kum dang zawngah chuan 35 micrograms per cubic meter hnuaiyah vek a la awm. Chutih rualin chhiat lam a pan ve hret hret a ni. Thal lai leh lo hal laiin boruak a bawlhhlawh zual a, kuminah pawh January atanga May thla thleng khan a sang ve hle a, hlauhawm lutuk chin erawh a ni lo. June thla atang erawh chuan a tlahniam ve leh deuh. Krismas leh Kum thar vuak vet pawh boruak a bawlhhlawh em em lo a, amaherawhchu, kum hlui thlah zan zanlai halpuah hal hunlai bik te-ah chuan a sang ve hle a ni, an ti

Kum 2022 December thlaah khan Lunglei khawpui a veng lun ber Venglaiah chuan air quality hi 17 micrograms per cubic meter niin 2023 December-ah khan 18 micrograms per cubic meter a ni a. Kumin 2024 December thla-ah hian engzat nge a nih ang tih chu kumhlui thlah zana halpuah leh halmawi hal leh hal loh atangin hriat theih a ni dawn a ni, an ti.



FIREWORKS

Sorkarin hunpui vuakveta halpuah leh halmawi a khapna kawngah YMA leh Police-te tangkawpin mipuite hnena ngenna leh hriattirna kawng hrang hrangin a kalpui mek.

Aizawl District hnuai police station hrang hrangte chuan khapna thupek hi bawhzuiin theihtawp chhuahin halpuah leh halmawi zuar leh kawl dap hna an thawk mek a. Dawr, kudam leh lirthei hrang hrangte check thin niin, transport leh courier service te endik an nih bakah online a zuar thinte pawh theih ang anga chhui zui an ni baw. Aizawl Police-te chuan sorkarin khapna thupek a chhuahte zawm theuh turin mipuite a ngen a, halpuah leh halmawi hal chu mihring hriselna atan a that loh mai bakah ranvulh te'n an thihpui thin avangin thupekte zawm theuh a Police in thupek an kenkawh kawngah thawhpui turin a sawm a ni.

Central YMA pawhin sorkar phalloh thil halpuah leh halmawi te hal lo tur leh zuar lo turin mitin a ngen a, Branch YMA hrang hrangte pawh mahni huamchhung theuhvah theihtawpa tanla turin a ngen a. Veng tinah pawh aurinna leh banner hmangte inhriattirna hi tih chhuah a nih bakah social media lamah pawh halpuah leh halmawi tel lova kumthar hmang tura ngenna te siam a ni baw.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



OIL FIRE

Lunglei khawpui bul Hrangchalkawnah nimin khan truck a petrol phurh, plastic bura dah a kang a, mi 2 hliamin truck hi a kang chhe hneh hle.

Nimin chhun dar 12;00 vel khan Hrangchalkawn leh TNT inkarah truck, MZ 02 B/5574 a plastic bur 10 a petrol thun dahluh tawh chu a kang a. Truck khalhtu leh a handyman-in hliam tenau an tuar a, damdawiinah hruai an ni. Thudawinna in a sawi danin petrol hi Lawngtlai lam pana kal niin plastic barrel pawlah thunin truck hian barrel 10 phur a. Barrel pakhatat hian litre 220 vel zel a leng a ni. driver leh handyman pawhin hliam tenau tuar in an kang a, damdawiinah hruai an ni.

Motor neitu hi Pu Liansiama a ni a, a khalhtu hi Lalmuamkima niin handyman hi Lalkrossthanga a ni. Petrol hi Myanmar lama a hralh tura phurh pheih tum ni a rin a ni.

<><><>

FOREIGN TOURISTS

Kum 2023-2024 tangka kum chhungin Mizoramah ramdang atangin mi (foreign tourist) 3,884 an lo zin.

Directorate of Economics & Statistics chhinchhiah danin India ram pawn atanga Mizoram rawn flawhtu zingah United States mi an tam ber a, mi 1,336 an ni a, Australia mite'n dawtin 298 an lo zin a, United Kingdom atangin mi 228 an lo zin bawh. Ram dang atanga rawn zin dangte chu Japan 148, Bangladesh 111, Isarel 49, Germany 47, South Korea 45, Norway 37, Canada 30, France 18, Netherlands 3, khawi ram nge hriat loh 3 leh ramdang tarlan loh atanga rawn zin belhkhawm 1,531 te an ni.

<><><>

PM

Prime Minister Narendra Modi chuan nimin khan Dan chu India hnam kaihruaitu bul ber anih thu a sawi. Kumthar january ni 26-a India Constitution in kum 75 a tling tur chu thil ropui tak ani a ti. Pu Modi hian Akashvani programme Mann Ki Baat ah sawiin kumin constitution day pualin thil tamtak kalpui chhonzawm zel tur thawh anih thu a sawi a, Danpui nena inzawm theih tur bik website constitution75.com siam anih thu a sawi bawh a, Mann Ki Baat ngaithlatute naupang leh thalai te chu website flawh turin a sawm a ni. He website ah hian thuhmahruai te chhiarin video upload theih ani a, tawng hrang hrang a constitution chhiar theihna leh Constitution chungchang zawhna zawh theihna siam a ni bawh.

January ni 13 atangin Prayagraj ah Maha kumbh neih a ni dawn a, inbuatsaihna kalpui mek a nih thu sawiin, Pu Modi chuan hetiang a inthliarna awm lo a mi tam tak an pungkawm chu lawmawm a tih thu sawiin khawvel hmun dangah hmuh tur a awmlo tih a sawi bawh. Kumbh chu inpumkhatna Maha Kumbh a nih thu a sawi a, mipui te chu maha kumbh ah tel a inpumkhatna rilru pu turin a chah a, khawtlang a inhuatna leh inngirngona te ti bo tur a intiam turin a chah a ni.

<><><>